

名

山

藏

名山藏卷之

臣何喬遠恭輯

典謨記

武宗毅皇帝

武宗毅皇帝御諱厚熜孝宗嫡長子也生二歲立爲太子稍長英敏好騎射孝宗大漸召大學士劉健李東陽謝遷榻前執健手以託孝宗崩上以五月壬寅卽皇帝位大赦詔天下以明年爲正德元年論不謹侍大行皇帝藥者罪虜大寇宣府命太監苗達監督軍務保國公朱輝佩紅虜將軍印充總兵官右都御

史史琳提督軍務往禦之六月思恩府土官岑濬作亂總督兩廣左都御史潘蕃等討平之裁華亭丹徒丹陽金壇四縣治農承庚申上大行皇帝尊諡廟號詔天下奉安孝肅太皇太后神主於奉慈殿八月尊王皇太后爲太皇太后調練武等營太監繁等於耀武等營以尚衣等監太監祥等筦神機營自內旨兵部請如卽位詔書裁革諸添設監鎗分守守備內臣戶部請裁革各倉庫監局筦事內官皆不許京師久雨九月許慶雲侯周壽壽寧侯張鶴齡家人商人譚景清等買長蘆兩淮鹽引十月祧熙祖庚午葬泰陵

甲戌附孝宗敬皇帝太廟翰林軍袁綬言十九事其  
一言今士大夫恒以忠厚簡默自持居鄉黨可也若  
以事君則爲容悅以臨事則爲因循間有矯俗則羣  
譏共排必無所容而後已朝廷當明示意嚮釐正之  
其二文武有司清慎者甘恬退而近傲貪墨者巧奔  
競而近恭上人好貨喜諂是以清慎未蒙旌貪墨恒  
超擢用人者不可不加之意下所司十一月命太監  
興司香太和山兼分守湖廣科道官奏初詔革天下  
守備內官非舊額者盡未乾遣興無以示天下信不  
許十二月立仁壽宮十皇莊虜大入固原

元年正月以太監劉瑾管五千營張永管神機營中  
軍并顯武營徐智管番武營馬永成管神機營右掖  
王瀾管神機營中軍二司自內旨以太監牛總鎮兩  
廣召還總鎮太監經自內旨二月以都知監左監丞  
能守大同以御馬左監丞彬守右衛自內旨乙丑耕  
籍田戊辰劉健謝遷李東陽自劾求退不許丁丑又  
不許己卯又不許三月甲申視學祠宋徐應鑣於錢  
塘以太監宏管神機營左掖三司景昌管右掖三司  
調馬永成中軍二司孫和神機右掖自內旨尚膳監  
宋蓋果乞監督京倉許之戶部左侍郎陳清監察御

史朱廷聲乞如卽位詔書不聽四月五府六部臣請  
上勤政好學止騎射戒微行毋淫于遊上曰善廣東  
盜禍玄祖等平刑科給事中湯禮敬言陛下更始之  
初災異屢出旱潦蝻蝗星變天鼓之類疊見京邑近  
者雷電交作雨雹雜下當六陽用事之時陰氣與抗  
得非邪佞倖用忠鯁疎遠之應乎聞陛下宮中走馬  
獵射以爲遊樂羣臣有所論列雖賜俞允未見克謹  
消弭之道伏願思祖宗基業之大念先帝付託之重  
講學勤政去冗禁濫必矜細行無忽小民左右咸選  
忠良起居悉內於正則中外乂安至治可期報聞劉

健乞休不許南京兵科給事中牧相十三道御史陸崑等上疏竊聞近日朝體紛更政出多門有不經內閣徑從中斷有雖辭議擬旋卽改易有因事建明未蒙俞允劉健親受先帝顧命未及一年抗章求退豈無所激大臣不可不敬惟陛下畱念報聞五月以太監軻莞効勇營賢莞神機營右哨舉鎮守江西自內旨兵部尚書劉大夏乞歸許之以太監魏彬莞神機營中軍頭司并奮武營調張永於三千營兼管三千哨馬營以王潤代永張恩代潤自內旨六月以太監劉雲守備南京麥秀掌南京內織染局劉璟鎮守浙

江岑章鎮守遼東梁裕鎮守福建張永鎮守山東自  
內旨調神機營三司司設監太監張英禔神機營左  
掖并耀武營而以楊春代英以太監劉瑾爲神機營  
把總同提督十二營而以馬永成代瑾以賴義代永  
成自內旨以孫清鎮守貴州王宏鎮守薊平山海等  
處自內旨授孔彥繩翰林院五經博士主衢州孔子  
廟祀辛酉雷夜擊西中門柱春暴風大祀殿齋宮獸  
瓦墜郊壇樹折劉健李東陽謝遷請禁奢靡戒玩戲  
罷弋獵以弭災上曰朕將改過焉於是府部科道諸  
臣皆陳言劉健摘其要者五事請省置坐隅一日單



騎輕出宮禁二曰頻幸監局三曰泛舟海子四曰鷹犬彈射五曰曲納內侍所獻飲食七月戶科都給事中張文右給事中倪議給事中劉莖薛金陳言五事詞多觸忤其一言內臣遷改增添紛然乞減省以遵明詔上曰內臣鎮守故事也朕予奪因才過焉文等其自劾文自伏粗率執奏如初上責其不敬人罰三月俸八月立夏氏爲皇后大學士劉健等請早寢蚤起以勵朝政減膳徹樂以畏天示親告親祭以其廟祀屏逐嗜好以存諒闇之禮上曰善九月免午講劉健諫報聞命內官監左少監崔果王瓚織造於南京

工部尚書魯鑑給事中諧御史晏等諫止不聽果乞  
長蘆鹽引萬二千以行許之劉健李東陽謝遷不肯  
草勅五府六部科道官皆諫戶部請予半上召健等  
曰其盡與之健等言不可退復諫乃從十月濬滏陽  
河夜以劉瑾掌司禮監事大學士劉健李東陽謝遷  
皆辭位上許健遷畱東陽於是天下事一決於瑾以  
吏部尚書焦芳爲大學士十一月戶部尚書韓文坐  
失覺贖金降一級致仕戶科給事中徐昂論抃遂并  
文皆削職除名十二月給事中艾洪李紳劉蕡南京  
給事中戴銑李光翰任惠徐蕃牧相徐暹御史薄彥

徽貢安甫葛浩史良臣李熙姚學禮張鳴鳳陸崑蔣  
欽曹閔王昭道王宏蕭乾光各上疏言上狎比佞倖  
輕顧命臣上大怒廷杖之除名爲民南京兵部尚書  
林瀚聞健遷去對客歎息應天府尹陸珩坐傳示京  
師奏稟皆降三級致仕兵部主事王守仁監察御史  
陳琳先後疏抹皆降邊方守仁杖景皇后汪氏薨都  
察院右僉都御史林俊乞致仕許之令工部尚書兼  
大理卿掌寺事楊守隨左都御史張敷華致仕自內  
旨

二年正月乙亥朔日有食之命甘肅鎮巡官採辦野

味捕取土豹於邊方詔上元節勿禁民間作樂門正月以故永平大長公主府第爲酒醋麵局外厰添議邊關隘口守備內官南京國子監祭酒章懋乞致仕許之虜大入花馬池二月海寇施天常平鄭王祐於薨三月取趙福等六十三人育鷹子內苑陞皇親夏助爲錦衣衛指揮使夏臣指揮同知葉相何謙正千戶葉椿葉鏗夏傑百戶皆世襲封皇親都督同知夏儒爲慶陽伯造新寺於內苑上習佛門焉因陞大慈恩寺禪師領占竹爲灌頂大國師大能仁寺禪師麻的寶哩塔西麻穆耶那卜堅參大隆善護國寺禪師

普皆藏卜爲國師皆予誥劉瑾矯旨追論劉健等爲  
奸黨辛未朝退跪羣臣金水橋南宣勅曰朕幼冲嗣  
位惟賴廷臣匡弼不逮豈意奸臣范亨王岳徐智竊  
弄威福顛倒是非去歲私與大學士劉健謝遷尚書  
韓文楊守隨張敷華林瀚郎中李夢陽主事王守仁  
王綸孫磐黃昭簡計劉瑞給事中湯禮敬陳廷徐昂  
陶諧劉莖艾洪呂狎任惠李光瀚戴銑徐蕃牧相徐  
暹張良弼葛嵩趙士賢御史陳琳貢安甫史良佐曹  
閔王弘任諾李熙王蕃葛浩陸崑張鳴鳳陸乾元姚  
學禮黃昭道蔣欽薄彥徽潘鏜王良臣趙祐何天衢

公瑤楊章熊卓朱廷聲劉玉等彼此交通穿鑿阿附  
傷殘善類煽動浮言朕雖察審尚務優容後事跡漸  
露各反側不安朕因其自陳俯遂休致之請若自憤  
則公言其譴責之繇今勅內未罪者吏部其一令致  
仕毋使惡稔夫人臣忠敬爲本不聞以阿附爲榮朕  
不暴明何從知悉繼自今尚精白恪共毋蹈覆轍自  
貽辱累四月命豫新明歲鰲山諸燈賜寧王宸濠音  
樂院邑長榮等四人冠帶勅各處鎮守太監干預刑  
名諸政五月月食度天下僧道四萬人寧王宸濠乞  
復護衛許之六月奉安孝宗主太廟修歷代通鑑纂

要成七月罷每歲修邊役輸資京師復開白塔河八月黃河清慶雲見翼軫世宗皇帝生于興命江南買果品捕禽鳥征商使致之修南海子殿宇橋梁造豹房上自此居豹房天下事益委瑾九月錦衣指揮成藁城民增獻地爲皇莊納之錦衣指揮同知于永善陰道秘戲上悅之以爲都指揮同知自內旨陞太監谷大用父奉張永父友俱錦衣衛指揮使賜貢獅子者撒馬兒伍喇馬力罕差納麻爲錦衣百戶十一月贈太監丘聚馬永成魏彬父俱錦衣指揮使與祭一壇冊惟焯爲秦王設尼山洙泗二書院學錄各一員

以孔聞禮爲翰林院五經博士主子思廟祀於鄒上  
景皇后冊寶十二月虜入涼州加寧王宸濠歲祿二  
千石衮龍紅文綺三疋絹一疋賞其承奉長史有差  
賜書旌王賢遍諭諸宗室冊祐擇爲鄭王于永矯旨  
索回回女善西域舞者十二人以進

三年正月三月冊祐櫝爲襄王祐櫝爲崇王祐櫝爲  
徽王贈劉瑾父榮爲後軍都督府都督同知母一品  
夫人增陝西河南山東山西四川鄉試解額祠宋陳  
瓚陳文龍於興化鬻武爵監生度僧道贖罪以經邊  
上悅樂官臧賢賢請增造御樂庫房許之寧王宸濠



請追獎其先王之德上使諭祭焉伊王諱鏘薨蜀王賓瀚薨六月大織造繪綺於江南以備內廷賞賜七月命樂工教樂以盛慶成之宴民間有善眩戲者許進之京師榮王之國九月戊戌故兵部尚書劉大夏於邊

四年正月憲廟廢后吳氏薨二月勒故大學士劉健謝遷爲民著令餘姚人母官京師賜劉瑾地作玄明宮益徙民墳斥之三月禁百官有名天者四月虜數寇大同大學士王鏊乞休許之命有司送諸府樂工於教坊修孝宗實錄成六月樂平縣姚源洞賊汪澄

二等作亂八月陞大隆善護國寺國師普肖藏卜爲  
法王刺麻羅竹班卓班丹端竹班卓羅竹朶而只堅  
參俱爲左覺義道錄司左正一柏尚寬爲真人自內  
旨九月兩廣江西湖廣四川陝西多盜虜入延綏邊  
十月月食十二月虜入花馬池總制尚書才寬死之  
予贈諡開武西內予冒國姓稱義子者朱鐸等十一  
人爲錦衣衛百戶朱璽等四人爲所鎮撫謫戍平江  
伯陳熊并其妻子於海南十二月追奪劉健謝遷誥  
命及故所賜玉帶服色文武官坐事爲民充軍閒住  
者誥勅並追奪之命選精通樂藝者八百戶於樂院

五年正月裁江西鄉試解額禁萬安新城人仕者選  
除爲京官籍故尚書秦紘家二月四川藍伍盜起四  
川盜突入陝西轉掠湖廣四月虜寇莊浪陞大能仁  
寺國師邨小堅參禪師劄巴藏播爲法王都綱邨卜  
領占爲佛子公葛端竹堅播札失爲禪師大隆善護  
國寺刺毛綽卽羅竹爲佛子大慈恩寺國師乳如領  
占爲西天佛子革職國師哈刺札爲佛子刺麻也舍  
窩爲禪師封致仕右都督神英爲涇陽伯大理寺右  
評事羅僑輿攬直言下廷議莫敢是命降爲教職安  
化王眞鐸反命涇陽伯神英佩平胡將軍印充總兵

官在者御史楊一清總制陝西延寧甘涼各路軍務  
與御用監太監張永出師討之師未至游擊將軍仇  
鉞襲寘鐇遂平問讓榻爲蜀王五月湖廣盜劉惟華  
洪景清等掠桂陽指揮鄧旻死之百戶于江力戰擊  
殺景清惟華并力刺江亦死六月陞大隆善寺禪師  
星吉班丹爲國師左覺義羅竹班等爲禪師刺麻札  
竹爲左覺義三竹捨刺爲右覺義倫竹堅參爲都綱  
大慈恩寺佛子乳奴領占捨刺札俱爲法王刺麻捨  
列星吉佛子也夫短竹爲禪師大能仁寺刺麻領占  
播爲都綱上自命曰大慶法王因鑄大慶法王西天

覺道圓明自在大定慧佛金印兼給誥命鐫印曰天  
一添設贛瑞汀漳鄖陽漢中保寧夔州及兩廣諸府  
捕盜通判各一員惠潮賊林貴等平劫郴永者廣西  
徭賊平七月楚王均鉅薨總制軍務尚書洪鍾總兵  
官毛倫擒斬湖廣賊楊清丘仁等平之虜掠臨水堡  
添設守備於天津三衛以禦盜四川流賊往來通巴  
廣元袁龍間改莆田人監察御史陳茂烈爲晉江教  
諭八月太監張永自安化還上戎衣御東長安門文  
武大臣候橋東頌繫宣鐸獻其俘金鼓之聲振上置  
酒勞永諸閣侍比夜劉瑾先退永密奏曰宣鐸以誅

劉瑾爲名致寇者瑾也因上其十七事曰瑾且反上曰負我負我永曰請亟之諸閣皆詆瑾上自執之夜繫之菜廠降爲奉御且籍沒之得僞璽一牙牌五百扇中置刀二及衣甲片帑之屬上大怒付獄下廷議誅之收其黨吏部尚書張祿及掌錦衣衛事指揮使楊玉掌鎮撫司事指揮石文義于都察院獄黜大學士曹元及其奸黨二十餘人皆爲民凡瑾所更置予奪者悉復故復革寧王宸濠護衛以慶王台浚不抹正寅鑄反革護衛及祿米三之一九月加張永歲祿米四十八石賞銀伍百兩紵絲五十表裏封仇鉞咸

寧伯其餘陞賞有差上曰張永奉命出師討畔定民還奏逆瑾消變甚大歲賞止其身未稱其下兵部議兵部尚書王敞會諸臣議永救寧中外兩建奇功其兄弟並宜封伯以稱國家報功意上曰是乃封永兄富泰安伯永弟容定安伯復陳熊平江伯以錦衣衛指揮使朱寧管南鎮撫司事口內旨封義子錦衣衛指揮同知朱德爲永壽伯太監谷大用兄大寬高平伯馬永成兄山平京伯魏彬弟英鎮安伯四川流賊藍廷瑞鄔木恕廖惠攻破通江城巡撫都御史林俊等擊敗之廷瑞走惠被擒餘賊入陝西十月陞國師

羅竹班卓丹端竹爲灌頂大國師禪師領占陸竹爲  
國師給番僧度牒三萬漢僧道士各五千以廣番教  
姚源洞賊汪澄三王浩八等劫掠樂平餘干諸縣破  
安仁霸州強賊劉七等詣州自首貫其死斬逆瑾親  
屬傑等十五人瑾姪劉二漢黨張文冕楊玉等于市  
凌遲石文義張綵死獄中肆屍劉之復劉大夏太子  
太保兵部尚書楊守隨工部尚書林瀚南京兵部尚  
書戶部尚書太子少保吏部尚書艾璞都  
察院右副都御史皆致仕如故十二月重慶強賊曹  
弼等劫掠真州轉南川纂江等縣陷江津分巡僉事



吳景率典史張俊拒戰皆死之上王太皇太后張皇  
太后徽號以朱寧掌錦衣事都指揮僉事馬鉞指揮  
使朱安朱福掌南鎮撫司事百戶文達陞正千戶總  
旗麟鐸俱副千戶總旗文友琦小旗秀舍人倉俱百  
戶舍人相招賢銘永俱所鎮撫自內旨陞御用監各  
色官匠錦衣衛副千戶淮爲正千戶總旗諤雄爲所  
鎮撫文思院副使景爲錦衣衛百戶儒士沂爲鴻臚  
序班人匠忠等三十四人爲文思院副使祥等六十  
五人爲皮作局副使各給與牙牌自內旨

六年正月藍鄆賊陷營山縣僉事王源典史林俊死

之以太監甄謹鎮守河南王潤鎮守湖廣畢真鎮守  
山東商鳳鎮守福建張倫鎮守雲南李嵩分守居庸  
張鳳守備紫荆許全守備淮安梁泰堯廣東市舶自  
內旨二月以太監黎安鎮守江西自內旨賊汪澄三  
等陷安仁縣指揮養勳通判梁奎死之盜起畿甸青  
萊徐淮間及江西福建令寅鑄自殺燬其屍增造豹  
房立僧寺禁中巡撫四川都御史林俊使指揮李蔭  
擊江津賊曹輔等大焚之起左都御史陳金總制江  
西等處軍務以平賊三月霸州賊劉晨劉六齊彥明  
顧子美等流劫山東樂安濱州高苑城破之賊劫彰

德入天津轉封丘長垣曹東明等縣百戶張世祿死  
之江西賊入新淦萬安新喻諸縣山東賊入金鄉縣  
賊入博野饒陽南宮無極東明等縣深冀定祁開等  
州大殺掠虜入河套寇沿邊諸堡命惠安伯張偉充  
總兵官陞巡撫大同右副都御史馬中錫爲左副都  
御史提督軍務都指揮朱振戴儀俱充參將發京營  
軍討賊河南山東北直隸賊攻破濱州臨朐臨淄昌  
樂日照蒲臺武城陽信曲阜泰安諸州縣賊據樂安  
指揮朱泰擊勝之賊入清豐滑賊犯闕里賊破鄆城  
賊犯信陽指揮馬振陳鎮追擊賊于應山皆死之四

月賊破萊蕪知縣熊驂主簿韓塘死之刑部員外郎宿進上疏請察劉瑾餘黨之在內侍者羣小惡而譖之上怒廷杖進黜爲民戶部主事王崇慶疏揀下詔獄久之降壽康驛丞賊李龍等出蒙陰破長山參將李瑾追擊之青城勝之青城圍解賊破濰昌邑至于平度指揮張陞知事杜德銘死之五月賊藍廷瑞自鹽亭縣焚劫富村及柳邊驛殺百戶雄茂州知州汪鳳朝死之轉破梓潼綿魏城遂至劔判官羅明及其子介率義官王思政鄭廷祿等禦之城破皆被害賊趨江油官軍遏焉乃返鹽亭循南部去山東賊流入

河南朱振擊敗之于胙城賊破平度萊蕪遂抵高密  
賊楊謙等掠濬知縣陳滯擊勝之遁入太行山冊訐  
淵爲伊王教坊司左司樂臧賢以疾求退上勉畱之  
陞爲奉鑾河南賊入湖廣破雲夢掠黃趨江西掠星  
子復歸湖廣還攻河南商城轉入潁六月虜寇延綏  
山西賊李華等起與劉六合劉瑾餘黨亡命者多從  
之掠壺關賊楊虎入山西破池水趙城祁大谷江津  
賊曹輔餘黨流入貴州石阡李崖井與賊任俸舟等  
陷婺川龍泉坪焚烏江屯寨賊楊虎等復自山西十  
六盤山口還破武安燬臨洺鎮掠曲周武城清河故

城等縣及于景復入文安亦與劉六合江西華材山賊陳福一等攻破瑞州府賊復入山東破武城縣七月賊破棗強知縣段彖死之山東賊連破武城樂安陽信霑化海豐清城等縣轉攻樂陵知縣許達敗走之賊破武安戴儀擊之從臨洺關遁去賊破南宮掠寧晉賊千餘騎至阜城縣焚其東南二門入之復入獻焚虜而去江西賊破臨江府八月命兵部侍郎陸完兼左都御史提督軍務調宣府延綏兩鎮兵使副總兵許泰馮禎遊擊將軍邵永領之并京營官軍往直隸山東河南等處勦賊總制尚書洪鍾巡撫四川

都御史林俊等獲賊首藍廷瑞鄢本恕及其黨與陞  
賞有差福建賊破南豐湖廣賊破永寧轉入瑞州境  
江西賊破樂安執其知縣主簿教諭等官賊劉六劉  
七等攻破大城靜海二縣大焚掠遂至青興濟滄賊  
復入青以張偉馬中錫朱振玩賊不治下之獄九月  
賊楊虎等二千餘人攻滄賊攻武城平原禹城臨邑  
霑化在平陽信蒲臺樂安諸縣皆破之賊破靜海縣  
馮禎破楊虎賊於阜城卻永破賊於棗強復與許泰  
破之于參老集及薛官屯藍廷瑞鄢本恕餘黨三千  
餘人復自陝西漢中流入寧羗沔等州縣遂及略陽

扶風知縣孫璽死之

璽字廷信代州人明春於慕荀

令扶風藍賊至都御史藍章欲城略陽謂略陽知縣

嚴順橋樑璽往城之璽至略陽將下令順趾之基邑

人賂璽金求無城璽不聽期一月城三面成藍賊卒

至三日城不可守矣易亡璽入不聽順言亡者如也

乃率城中人守之閱三日賊弗克攻欲去會賊執過

悉人殺之發公移知城中窘悉賊衆環攻自辰至晡

順發賊陷城入執璽璽罵賊怒鬚殺之大掠三日去

順渡江還順報曰與扶風知縣同奔而溺水蕩扶風

知縣尸都御史怒責求屍順大窘與簿謀取江濱一

乃在京師投匭辨事下御史王廷相乃得實奏上制

贈光祿寺少卿

癸亥月食賊楊虎等破威新河二城

賊劉六等破日照海寧壽張陽穀寧陽曲阜沂水泗

水等十城廣東福建流賊三千餘人入江西永豐破

名山樓

卷之二十

十六



樂安新淦廣東徭賊破湖廣鄧縣陞錦衣衛指揮使  
朱寧爲都指揮僉事本衛掌印兼提督官較辦事錦  
衣衛指揮使朱安堂上辦事提督官較巡捕指揮使  
朱增南鎮撫司管事崇王祐桤薨十月以朱寧爲都  
督同知賊入長山典史李暹死之賊劉六等攻濟寧  
州不克焚漕船千二百餘艘賊劉六等寇曹州馮禎  
等擊勝之虜大入大同賊破廣平虜犯甘州賊方四  
自貴州復入四川陷南川綦江十一月賊自宿遷渡  
河攻虹命御馬監太監谷大用總督軍務伏羌伯毛  
銳充總兵官太監張忠管神鎗統領京營軍與侍郎

陸完會勦山東直隸等處賊遣大臣賑濟兩畿山東  
河南虜寇宣府以太平倉賞永壽伯朱德爲私第戶  
部尚書孫交諫不聽以破賊功陞陸完爲右都御史  
馮禎邵永爲都督僉事許泰爲署都督僉事賊楊虎  
破宿遷縣十二月賊入衡山邵永追賊於濰縣斬首  
八百級流賊自章丘奔突廣平曲周威又北奔新河  
南宮棗強冀轉至衡水破之賊劉三等劫掠項城商  
水西華等縣僭稱總督元帥相戒毋妄殺詐爲牌帖  
約官吏毋避黃河清自清河口至柳舖九十餘里者  
三日賊入歸德夏邑永城虞城賊劫蠡攻東鹿破深

七年正月賊犯霸州京師戒嚴賊入大城知縣張汝舟主簿李銓迎戰死之賊自安肅博野攻蠡及臨城臨城主簿張俊拒之斬其酋一人遂遇害四川賊麻六兒越百丈關以向川東副使馮傑禦之蒼溪死之贈死賊者上蔡知縣霍恩西平知縣王佐爲光祿寺少卿巡撫四川都御史林俊復敗方四賊於江津二月河南賊劉三趙風子邢老虎等連破州縣報日急以都察院右副都御史彭澤同咸寧伯仇鉞提督軍務御馬監太監陸圜監督軍務司設監太監尹生監管神鎗以破賊賊掠利都指揮周琮死之賊入萊州

界指揮僉事蔡顯與其子淇英順死之邵永追敗賊  
李隆於陳村店劉六賊於宋家莊三月賊破裕州上  
蔡西平圍唐副總兵時源敗賊于陽武吏部尚書楊  
一清言今鴻臚寺欽天監太醫院中書科錦衣衛鎮  
撫司傳陞乞陞并營繕文思院皮作局等衙門所副  
大使副使冠帶匠官文華仁智二殿御用監辦事官  
員監生儒士動以千計高者或至列卿其他較尉軍  
匠不可勝計僧道錄司號稱國師真人法王佛子者  
出入禁闥供饋之盛擬於王侯方今水旱相仍盜賊  
充斥師疲而餉絕民困而斂煩閭閻鮮儋石之藏太

谷無數歲之儲廩糧柴薪日見難給乞大奮乾綱速  
賜裁罷上命退五人餘如故以太監張雄總督官較  
辦事方四賊復犯貴州賜故西天佛子捨刺星吉祭  
葬賊陷碭山蕭睢寧主簿金聲丘紳死之賊陷梁山  
主簿時桓死之賊劉六復焚蘄黃等州縣副總兵劉  
暉追賊滕嶧大破之副總兵時源馮禎參將神周金  
輔擊賊西平大勝之賊繇上蔡商水西走招集散亡  
復攻鄢陵西華長葛新鄭汜水鞏圍河南府三日馮  
禎死之賊攻夏邑縣丞安宣死之江西右參政吳廷  
舉等敗賊連河寨四月賊楊虎自河南入山西澤潞

遠諸州陵川壺關高平沁水陽城翼城曲沃襄陵洪  
洞趙城靈石介休平遙祁大谷諸縣皆殘破殺掠以  
千萬計參將王某遇賊蒙討死之五月賊劉六劉七  
等敗於滕嶧奔登萊陸完率諸將破之追之於淮上  
盜劫羅山主簿王續宗死之賊劉三等自遂平趨成  
阜永順宣慰彭明輔等以土軍追擊破之撫州賊王  
珏等平吏部尚書楊一清等上言視朝聽政經筵日  
講帝王成規國家舊典也陛下月不過一二朝當講  
輒罷而竊聞龍輿畱駐豹房練兵花苑鼓砲之聲震  
駭城市甚非所以示中外訓來世願自今戒無度之

戲以保心體之和遠不經之所以重社稷之身上曰  
余知劉六誅殺總督南京糧儲御史馬炳然於夏口  
轉劫漢口指揮滿弼追之擒斬六十人其一中箭溺  
水死獲其屍或曰劉六也河南賊趨徐州渡河副總  
兵劉輝等敗賊於寇妖賊趙景隆起河南巡視侍郎  
黃鵬使人擊斬之遂解閏五月賊楊寡婦掠濰縣僉  
事許進擊敗之以太監崔安守備南京史泰鎮守貴  
州自內旨獲賊首方四磔於市咸寧伯仇鉞等擊賊  
光山大破之賊破活宿睢寧定遠諸州縣賊自河南  
入經曰轉掠黃陂都指揮陳表潘勳等擊破之聞榮

戒爲楚王以御馬監太監張銳提督東廠賊劉六等  
繇邳南渡河至固始副總兵時源參將神周姚信金  
輔遊擊將軍陳珣追擊趙鐸賈魁兒劉三張永兒朱  
諒盡獲之河南賊悉平賊廖麻子等掠福建賊劉七  
等入湖廣勅彭澤仇鉞仍率時源神周陳珣所部兵  
往勦之勅陸完陸闇兼提督河南軍務率金輔姚信  
等所部兵以殄殘賊六月方四餘黨奔寧羗遂犯沔  
賊劉七等自黃州下九江經安慶太平儀真以達鎮  
江所過殘掠以太監耿守分守遼陽自內旨黑青見  
京師七月丁卯月食大帽山賊張時旺何積欽等平



江西按察副使周憲討賊華林寨敗績死之山東殘賊復嘯聚劫掠冠朝城寧陽鄒費臨邑高唐諸州縣八月賊劉七等踰南京抵瓜州殺傷官軍監察御史周廣請罷朱寧逐番僧降爲驛丞戶部主事曹琥疏抹亦謫之周廣太倉人弘治乙丑進士歷知莆田吉寧輩欲寘之死上不之罪得無下詔獄貶懷遠驛丞寧怒水已使人遮道刺之實爲馬頭陀持波盟囉行乞四百餘里乃免武定侯郭勛鎮嶺南承望風旨僞以白金試廣廣拒不受一日攝廣閉府門筆擊之行省官莫敢抹御史爲言乃解久之遷建昌令再貶賊竹寨驛丞嘉靖初復爲御史歷南京刑部右侍郎賊劉七齊彥明自大江下孟瀆陸完追至鎮江與諸將盡殲之狼山九月調鎮守薊州等處太監宏于河南

以太監忻代之罷雲南鎮守太監綸奉以太監裕堂代之自內旨江西華林山賊羅光權等平以賊平加谷大用陸闇歲祿蔭翁姪各一人世襲錦衣指揮使進封仇鉞咸寧侯陞陸完左都御史彭澤右都御史皆加太子少保各蔭子一人世襲百戶其餘蔭叙有差賜義子百二十七人國姓則永壽伯朱德都督朱寧朱安爲之首其次朱國朱福朱剛皆至都督最下鎮撫旗舍列籍錦衣騰驤諸衛蓋皆中官廝養市井桀黠偶悅上心遂蒙收賜而朱採朱靜朱滿朱恩朱規五人者來自亡虜得幸於上云賊廖麻子陷銅梁

榮昌遂趨內江遂寧安岳直入樂至中江金堂等縣  
蹂反賊趙鏐等三十七人上命剝爲魁者六人皮以  
爲鞍韉騎乘之十月以太監許宣鎮守涼州調涼州  
太監張昭於寧夏使甘肅鎮守太監宋彬大同鎮守  
太監梁玉互調換自內旨工部言豹房成造迄今五  
年爲費不貲茲復增蓋二百餘間國乏民貧仰望聖  
明或罷或減不聽上曰盜賊勦平錦衣捕緝有功朱  
寧朱安朱謙朱剛朱國其皆蔭爲世襲錦衣衛指揮  
使故有傳奉恩陞者累功加叙焉十一月詔給終養  
御史陳茂烈月米三百兌調京營宣府官軍令以春

秋番換如班操例廷臣議不可不聽大慈恩寺法王乞修造僧房許之工部諫不聽十二月賊廖麻子攻破綿竹樂至金堂諸縣指揮殷輔死之山西妖賊李五平

八年正月江西賊王浩八聽撫復叛以右副都御史俞諫提督江西軍務代陳金討之以降虜脫脫太等充御馬監勇士兵部尚書何鑑諫不聽虜圍副總兵神周於大同命署都督同知許泰管操敢勇營都指揮僉事江彬管操神威營武平伯陳璘管操五軍營左掖指揮以下不用命者得以軍法從事泰彬兩人

者皆宣府邊將二月賊廖麻子降太監谷大用張閭以監督賊平請視仇鉞安化例使其弟姪得累功承蔭下兵部議累功非例也平賊諸將若劉暉邵永時源神周等驅馳戰陣萬死一生議功不過都督等官而已始懸賞格封拜如安化也謂如仇鉞獨出奇謀削平僭亂者也今羣賊殄滅非一人功累功承蔭居諸將右無以服諸將上不許令再議兵部請視朱寧例加陞至右都督毋令過諸將又不許命廷議羣臣請如兵部後請若有餘功別蔭弟姪一人上曰門庭兇寇累征不捷二臣相繼削平之其封谷大用余都

督僉事大亮爲永清伯陸閭弟錦衣衛指揮使永爲  
鎮平伯各賜勲階誥券祿千石賊王浩八等劫弋陽  
上饒等州縣命仇鉞領操團營官軍以許泰副之三  
月試御史孟洋論劾禮部尚書靳貴大學士梁儲下  
之獄降爲桂林教諭虜攻朔州圍馬邑改太平倉爲  
鎮國府以居宣府軍工部奏置府更倉非舊也且其  
位屬乾方乾天門也上曰天門宜闢其如旨以賊廖  
麻子降復叛逮四川巡撫都御史高崇熙治之四川  
軍餘范藻作亂四月王浩八屯開化掠婺源休寧諸  
縣大役軍士爲番僧修大慈恩寺鬻爵贖罪以充費

遊擊將軍閻勳擊敗廖麻子斬之五月御史賀泰諫  
賜義子姓外調之虜大入大同轉趨朔州馬邑頃之  
復入大同命仇鉞充總兵官往禦之六月河決黃陵  
岡戶部尚書孫交禮部尚書傅珪乞致仕許之科道  
官乞留不聽虜入鴈門掠五臺繁峙崞忻等處總督  
軍務都御史俞諫等大破賊王浩八於貴溪橋擒之  
贈死劉七賊者葉縣知縣唐天恩固始縣致仕縣丞  
曾基息縣致仕主簿邢祥官七月廣西盜李天寶等  
作亂巡撫都御史林廷選等討平之八月江西賊劉  
昌等奔據玉山知縣陳攬獲之賊攻瑞金知縣萬琛

死之都督同知朱安乞封贈三代如朱寧許之九月  
發太僕寺馬價銀萬兩於鎮國府買補馬匹自內旨  
姚源賊胡浩三等撫復叛俞諫等會勦平之上悅江  
彬賜之國姓并及領宣府軍省裨將六人十月虜人  
寧夏以太監宋輔分守建昌行都司自內旨大慈恩  
寺灌頂大國師也舍窩死命造塔葬之工部及工科  
給事中執奏曰非故事上曰著爲令虜掠遼東開原  
東鄉賊艾茹七撫復叛俞諫討擒之新淦賊張元三  
等作亂十一月賜大慶法王領占班丹番行童度牒  
聽其收度自便俞諫等奏擒賊首王重七等命械送



京師十二月追贈劉基太師與學士承旨宋濂國子祭酒宋訥竝賜諡

九年正月詔所在有司存恤致仕廉吏不能自給者戊辰設慶成宴炬而後莅位土官岑濬餘黨覃恩復叛寧王宸濠獻異燈先是元夕歲張燈費數萬計至是上以寧王獻召工入張乾清宮燈著柱壁如畫以氈幕承簷貯火樹焉火不戒延及外宮殿上見大燄悅之戲語曰燒棚太學士楊廷和梁儲費宏以宮災自劾請上親廟祭誠慈養勤學脩政受善任賢革禁中市肆以肅內令出西僧罷皇店停止工作以減免

織造還允調邊兵以謹外防上曰其令皇店賤下毋  
擾工作織造所司量緩急條奏戶科給事中呂經言  
乾清宮陛下正寢祖宗意欲萬世聖子神孫法天行  
清海內也陛下舍正宮而處豹房忽諸貳而蓄義子  
疎儒臣而昵番僧棄文德而寵邊帥忽朝政而開酒  
店信童豎而事遊佚天心赫怒顯示譴告臣望陛下  
乘此震驚大明悔悟講求消復之道討論利病之源  
下所司戶科給事中石天柱言先帝御宇十有八年  
清心守法始終不渝陛下所親見今廟祭率多遣代  
兩宮乘輿罕至前星未耀儲嗣久虛朝儀闕絕君臣

朕隔而外列皇店內張酒館寵信番僧從其鬼教招  
集邊軍同其服色或容結爲鬍第或縱禁中乘馬燕  
飲無復尊卑飲食不計冷煖數離深宮驅馳于外下  
營過隊日常不輟有時府衛之臣不知所在甚非所  
以爲宗社生靈長久計也變不虛兆陛下宜急還宮  
思愆改往不報天柱岳池人彭澤被誣當刑天柱陳澤功忤旨外調嘉靖初復職尋陞大  
理寺丞其餘廷臣言者皆不報監察御史劉天和王廷  
相坐忤鎮守太監廖堂皆降爲縣丞二月賊首王浩  
八艾茹七等伏誅庚子上夜微行至教坊司觀樂星  
南水平諸府大旱饑令所在發倉庾賑之四川賊喻

思年等平三月臨川賊陳政譚懿昌等爲寇姚源賊  
梅憲三等復叛都御史俞諫等皆發兵擊斬之立會  
子廟於嘉祥四月旱五月寧王宸濠復請復護衛屯  
田許之科道官諫不聽大學士費宏阻之左右譖於  
上上責宏兄弟羣從胡爲竝處清華者宏辭立許之  
從弟編修家亦附批致仕周厚耀爲崇王六月江西  
大池賊張元二等平貴州賊鄧先等平虜入西海子  
工部主事韓邦靖言諸臣頃因災變極陳闕失未見  
聽納前後以言獲罪者未蒙召用乞開延攬採擇之  
門以收人心下錦衣獄黜爲民詔自今言事黜謫者

母叙七月虜大寇大同懷安等處命太監張永總制  
軍務都督白玉掛印充總兵官備禦之使撫寧侯麒  
守紫荆寧晉伯岳守古北口崇信伯柱守居庸保定  
侯永福守倒馬指揮使寬守黃花指揮同知英守龍  
泉贈司禮監太監張淮廖鑾父爲錦衣都指揮使其  
母皆爲夫人予祭葬八月辛卯朔日有食之虜寇白  
羊口及浮圖峪連營數十里復入寧武關忻定襄寧  
化殺守備指揮陳經軍民死者相枕藉上設東西兩  
官廳禁中視團營練兵焉以太監張忠領東邊將許  
泰領西復設勇士營領以神周劉暉皆賜國姓爲義

子四鉅兵號外四家復使江彬兼統之上自領中官  
善騎射者爲一營曰中軍江彬數爲上言邊樂上大  
造刀銃甲箭將遊幸焉九月虜五萬餘騎劫掠萬全  
右衛路淮安超蔚州等處三萬騎入平虜城南都御  
史叢蘭總兵官白玉詐使餉於畛投毒焉伏而待之  
伏發虜中毒多死者上爲璫宮以齋門廡帷幕至于  
溷窟畢具陝人造之一年乃成贈御馬監太監于經  
父爲錦衣衛都指揮使母爲夫人經以開設皇店得  
幸自糜百萬治塚造香山碧雲二寺極宏壯上數臨  
幸之賜祠額護功勅命鎮國府參將宗斌楊玉京營

參將左欽湛臣各領官軍三千餘斌玉上班則赴  
操備下班則回鎮聽調欽臣上班則赴宣府禦備下  
班則交兌回京俱以遊擊將軍體統行事授太監張  
雄父千戶爲後府右都督帶俸朝參母贈一品夫人  
上入虎圈虎傷焉編修王思諫降爲驛丞十月刑部  
主事李中言曩者逆瑾竊權勢焰薰灼陛下一悟必  
誅無赦天下皆謂陛下有堯舜湯武之資太平立可  
致也夫何大權未收儲位未建義子未革小人日進  
君子日退士氣日靡言路日閉名器日輕賄賂日行  
紀綱日弛風俗日壞民財日殫軍政日弊奸逆旣除

善治未舉者良以陛下之心惑於異端也夫以禁門  
之嚴雜居邪道護國佛寺建於西華門內延住番僧  
與親居處異言曰沃忠言曰遠用舍顛倒政務乖廢  
豈不宜哉我憲宗偶惑妖僧繼曉隨悟其誣卽加斥  
譴孝宗卽位重之誅戮人心痛快伏惟陛下追法憲  
孝博選儒臣講求平治則天下之政次第舉矣疏人  
不報者累日尋降爲通衢驛丞

李中宇子廣吉水人其先世宋時有名次

魚者稱爲復齋先生中既謫驛丞歷官副都御史總督南京糧儲卒于官爲人莊嚴而意度安舒維通籍貴仕所居不蔽風雨其學以求仁爲主以閑邪爲功以天命流行爲事安其心中罔然無時岸爲實際恥而好易益事隱省其說草

吏科給事中張原直言

口錄書問及詩文行于世



時事降新添驛丞十一月令太監籓守山西太監英  
守遼陽調浙江鎮守太監璟總鎮兩廣以市舶司太  
監堂代之調分守懷來太監熹守宣府以太監寶代  
之以分守大同右衛太監錫鎮守大同以太監環代  
之自內旨命鎮國府春秋兩班及宣府備禦并新選  
團營勇士四衛軍皆於西官廳聽操使朱泰朱彬提  
調之十二月建乾清坤寧宮

名山藏卷之二十一

臣何喬遠恭輯

典謨記

武宗毅皇帝

十年正月乙丑將大祀羣臣待誓戒申刻乃免朝戊辰祀南郊己巳二鼓還兵科給事中良佐言郊廟之祀省牲誓戒齋靜以專宵風蒞事明信致享期昭假也爾者太廟之祭日暮行禮郊祀誓戒百官佇集終日忽免朝昏暗中執駕之人一呼而散宿衛之士羣譟而奔當臨齋宮百官晨而候駕暮往至壇一鼓免

朝隨卽行禮行禮方畢隨卽下營至于次日夜分乃  
逐一切非時與制矣又凡節令大朝賀每至昏暮而  
司晨之官尚報卯刻傳之四方所損非細乞自今敬  
時而慎禮不報京師訛言選女後宮民聞女皆不如  
禮而嫁人二月保安寺大德法王綽吉我些兒爲其  
徒領占緯節兒綽供劄失請得爲正副使還居烏思  
藏比大乘法王例入貢并給與國師誥命得入番熬  
設廣茶下禮部尚書劉春議不可令覆議春執奏詔  
與誥命罷設茶勅是時上習番經被番僧服綽吉我  
些兒輩出入豹房參廁權貂及領占緯節兒等歸輜

重相屬傳郵煩費焉三月大學士楊廷和丁父憂上  
留之請終制三請乃許主事戴冠言朝政三事降爲  
驛丞四月以太監守備黃花鎮自內旨江西副使胡  
世寧上書言請防寧寧王奏世寧爲妖言命錦衣捕  
治世寧聞道自詣遂下鎮撫獄論戍邊閏四月虜寇  
延綏寧夏五月京城內外多盜令提督廣東市舶太  
監曹宏採奇香土物以進大護國保安寺右覺義班  
丹倫竹爲其師祖大善法王星吉班丹乞祭葬禮部  
執奏無故事特許之六月朵顏夷分道內侵以都指  
揮同知桂勇署都督僉事充副總兵禦之庚午月食

既上微行西安門外越宿歸二月巡撫江西都御史  
俞諫討醴源賊徐九齡等平之虜入延綏焚圯塔等  
墩監察御史高公韶論劾兵部尚書王瓊瓊奏辨有  
旨令公韶首實御史鳳鳴等疏掾不聽降公韶富民  
典史重新太素殿及御馬監鍾鼓司南城豹房新房  
火藥庫天鵝房船塢太素殿修葺舊制八月虜大入  
固原九月虜寇隴州亦卜剌復寇洮岷以太監鑾鎮  
守陝西景鎮守河南南鎮守湖廣自內旨命御用監  
太監永同御馬監太監大用總管神機并提督十二  
團營以御馬監太監忠監督團營西官廳保管神機

營中軍四司立威營學管神機營右哨頭司并鼓勇  
營十月以太監熨鎮守山東調鎮守貴州太監泰於  
雲南以太監鎮代之自內旨十一月嬖倖言西城胡  
僧有知三生者西人謂之活佛上使太監劉允往迎  
率指揮千戶百餘人甲士千以珠琲爲幡幢黃金爲  
七供賜法王金印袈裟及其徒饋賜鉅萬計勅以十  
年往返得便宜處置錢物益發官軍護送之十二月  
癸丑朔日有食之虜入渾源應州馬邑威遠山陰等  
處戊辰月食命太監郭原鎮守遼東劉祥鎮守延綏  
審城總鎮兩廣許蒲鎮守江西王保鎮守四川自內

旨賜都督朱寧及妻并三代誥命

十一年正月監察御史程啓充言自古聖帝明王勤惕匪懈所以畏天命收人心勵臣工威夷狄也正旦令節文武百官夷蠻之使待漏入賀迄酉而後禮成迨散朝則夜久矣臣工枵腹奔命前仆後躓蹂躪爭歸有將軍趙朗竟死禁門其他小臣失簪笏毀冠裳至以得生相慶午門左右吏覓其官子呼其父僕求其主喧如市衢玩莫甚焉今郊祀在邇駕出有期伏望屏棄宴遊益崇儆畏以肅臣民觀瞻不報南京六科給事中懋等言直隸鎮守太監于熹故違勅旨輕

舉燒荒損折官軍爲罪大矣巡按御史張經劾奏陛下置燕不問而獨逮治經寧波民臣爲市舶太監崔珪用事詐取民財姦淫婦女殃民甚矣知府翟唐勘臣不法陛下置珪不問而獨逮治唐臣竊惜之伏惟勅下法司從公勘實果其被誣卽垂寬宥不報頃之御史啓言經及副使胡世寧久繫獄乞出之奪其俸虜寇龍門等衛復寇高臺雲州二堡二月勅召楊廷和廷和請終制許之給故右都御史熊繡養贍米月一石令居庸關擒致生虎豹御史屠僑言居庸關東北陵寢地諸兵以守關爲重不宜使擒生不報亦上



刺殘虜復寇西海虜入清河堡三月都督僉事馬昂之妹美已適人有身矣江彬以聞上召之昂妹善騎射解胡樂達語上嬖焉以昂爲右都督賜第太平倉東馬氏一門無大小皆賜蟒衣宦者呼昂舅科道官言昂驕淫廢將不繇趙薦旨從中下合朝惑駭昂兄弟子姪出入禁闈陛下降等削尊與其坐起睥睨薰灼外人盼畏陛下移于尤物蓄此禍水不韋李園其將復見昔王氏封侯黃霧四塞昂拜官之日異亦若是男戎曰幸女戎曰嬖馬昂女弟殆女戎也皆不報其後上從數騎過昂飲酒酣召昂妾昂不應上怒起

昂妹乃疎巡按直隸御史盧雍言宣府北鄰醜虜氣  
候風土大殊內地城中居室稠密下民安土重遷近  
者道路傳言朝廷欲爲離宮宣府以備臨幸輕出萬  
衆之重怨咨窮簷之心臣切謂不可不報大學士梁  
儲請擇藩屬之賢者召入京師以備儲選不報四月  
寧王宸濠造離宮城東北請名焉賜名曰陽春以太  
監清鎮守河南自內旨五月河南大饑賑之贈故布  
政使陳選爲光祿卿與諡収自宮男子三千四百餘  
人充海戶人月予斗米以內官監賜鎮守騰衝金齒  
自內旨六月命尚衣監太監智大織造於蘇杭七月

以御馬少監昇守備倒馬關自內旨織造太監宣過  
沛索挽舟之卒千沛知縣胡守約予五百補之以傭  
錢宣怒自至縣捕吏守約與宣爭宣還奏命逮守約  
詔獄既至勒爲民出胡世寧調戍之虜突入白羊口  
邊報急命左都督劉暉仍充總兵官太監張忠監督  
軍務參將桂勇賈鑑各領官軍禦之審王幼墾薨八  
月大閱取太僕戰馬二萬賑宛平縣貧民之遭虜殺  
掠者虜寇宣府及清河縣地方九月虜犯龍門所  
上猶縣盜謝知山起虜遁十月御史徐文華論太廟  
禮下詔獄黜爲民鎮守浙江太監堂奏僉事韓邦奇

沮格上供詔逮訊錦衣獄既至黜爲民十一月給事中徐之鑾言邇者都民爭言京師西角頭新設花酒店房或云車駕將幸其間或云朝廷實收其利陛下主天地民物富四海何至競錐刀倡優之館請亟罷之不報湖廣賊賀璋等平以修理象房畢工賞左都督朱寧工部尚書李銓侍郎俞琳劉永白金紵絲有差旗較匠役與陞賞者四十餘人以劉愷李浩爲禮部尚書張昱爲鴻臚寺卿魏境爲鴻臚寺左少卿自內旨降吏科都給事中呂經禮科都給事中潘埏一級補外自內旨科道官言今者用舍違宜爵賞太濫

貪汚竊位奔競肆行尚書以傳奉而驟得卿相以乞憐而苟安銓曹失職甚矣功次冒濫邊備廢弛黨逆者得襲官失機者得倖免推舉悉繇風旨是非不恤人言本兵廢墮極矣經唄二臣給事吏兵不敢療官上負陛下所以參駁論列屢爭可否兵部尚書王瓊忘損挫駁太甚假手內降連坐及經陛下不察而隳其計臣恐從此軟熟成風廉耻道喪耳目之司壅蔽欺言之氣摧折也伏望收回成命召使復職不報遣太監王燒造瓷器於饒州十二月丁未朔上視郊祀五年駕幸山夜入邊軍馳騎擁門扈從諸臣多蹂踐

者命左都督劉暉充總兵官署都督僉事傅愷充左  
參將都督僉事張椿充右參將操練團營東官廳軍  
復命暉選遼東精兵三千一百三十人以參將一人  
統之榆林遊擊將軍杭雄充參將選補所部軍如遼  
東數團操聽調陞都指揮同知神周爲後府都督同  
知詹冕爲都指揮僉事自內旨

十二年正月丁丑朔晡鳴鼓漏下十刻乃朝朝散百  
官吏宰相失譟沸有踐死者戊寅召內閣府部大臣  
及科道官左順門召甚急曰己丑郊旣將畋南海子  
皆諫已丑郊畋南海文武大臣追從駕方縱獵門閉

立而待既晡使歸候承天門漏下十刻駕還宮庚寅御奉天殿羣臣行慶成禮旣夜宴辛巳賜所獵獸於諸大臣及五品以下二月織造袍服於陝西給事中任忠言陝西地瘠早寒民多穴居衣皮舖蓋無他生計頃者沿邊被虜殺掠耕牧曠廢腹裏有三四府僅完又以調集土馬轉輸芻糧亦皆疲斃麋麥槁於春夏苗稼盡於雪霜逃竄流移十室而九近傳取黃牛皮及織造龍衣費輒數萬張太監往彼催辦進貢諸物索督峻急臣近奉使實親目之烏窮則啄獸窮則攫臣不勝意外之憂民或啄以攫不報以太監吳經

皆安守備南京自內旨虜入開原鎮夷堡參將孫崇  
太監王秋等禦之追至創忽兒河斬首八十六級三  
月癸巳賜舒芬等進士及第出身有差先是上騎至  
東西華門關者伏馬首諫回轡屢矣是日從數人出  
北安行東市比夜乃歸傳制四月命許泰張彬張洪  
同新寧伯譚祐等監試武舉六科都給事中石天柱  
等言近毀積慶鳴玉二坊民居有言欲造皇店酒館  
有言欲營義子府第有言欲開設教場者老稚轉徙  
哀號垂涕夫開設皇店數年於此商賈苦科索閭閻  
艱貿易朝廷得利甚微而下同壟斷不罷即已復增



設之則非恩也孰非陛下臣子從何有所謂義者高  
門聖廬居此嬖佞則非體也教場故宜城外在禁中  
者演習中官而已造鎮國府內操邊軍已謬誤矣更  
展拓之則非制也夫二坊之民近在西安門外也陛  
下於荒州遐部一聞窮苦尚降綸音紓厥愁困何至  
令肘腋下若禽獸驚駭毋所迴避伏賜停罷不報六  
月乙巳朔日有食之賜後軍左都督許泰前軍右都  
督張洪國姓七月上幸南海子馳一騎而已從近嬖  
數人部院臺諫諸臣詣跪海子門請還蹕上使慰之  
示還期至期不至諸臣洶洶欲再往諸大臣有言古

者天子四時巡狩南海子堦序耳洵洵者徒搖入心  
諸臣乃止八月甲辰朔上微服出德勝門幸昌平欲  
出居庸關關御史張欽兵而立關門以攔駕三抗章  
乙巳大學士梁儲將冤毛紀追請還蹕於沙河不納  
丙午儲及諸臣復請不報己酉上不得出關乃往東  
馬房轉通州循南海子返內辰上還豹房戊辰上夜  
視朝庚申梁儲等請擇宗室中親而賢者一人使司  
香內殿以預儲德王見潸薨丙寅上復夜出德勝門  
趨居庸辛未上度居庸門口始張御史閉關吾今亦  
來此遂幸宣府令谷大用禁關矣酉梁儲請還蹕不

報九月甲戌朔上駐宣府江彬營鎮國府第以居上羣臣上疏不報壬辰上駐蹕陽和城自號總督軍務威武大將軍總兵官丁酉萬壽聖節羣臣朝服遙賀戊戌虜屯五萬餘騎玉林將入寇命總兵官王勛副總兵張靚遊擊陳鈺孫鎮軍大同遼東參將蕭滓軍聚落遊擊時春軍天城副總兵陶杰參將楊玉軍延綏參將杭雄軍陽和副總兵朱鑾軍平虜遊擊周政軍威遠庚子獵陽和大雨雹士有死者以百萬金勞軍夜星隕辛丑幸大同虜分道南下勛靚鈺鎮率部領禦之上命春滓往爲援政鑾及參將麻循高時尾

虜後調宣府總兵朱振參將左欽郝動龐隆遊擊靳英俱會於陽和參將江栢張昶爲後應十月癸卯朔上駐順聖川甲辰勛遇虜繡女村督兵步戰虜南循應州去乙巳輓鉦勛遇虜應州城北戰數十合薄暮虜傍東山近圍勛比曉大霧乃解丙午勛等遇虜澗子村大戰諸將兵皆至虜以別騎迎敵不得合上率太監張永魏彬張忠都督朱彬等兵來援衆殊死戰虜稍卻軍乃合卽壘其處止乘輿丁未虜來攻壘上督諸將戰辰及酉百餘合乃退戊申引而西上與諸將且戰且進追至平虜朔諸邊會大風霧晝晦乃還

辛亥虜犯暖泉溝泥河兒上率兵駐老王溝虜退還  
蹕大同左衛已虜復入玉林城西上復分軍諸將軍  
按伏待十一月癸酉朔上駐蹕大同戊子還至宣府  
辛丑冬至羣臣朝虛朝班行亂十二月諸大臣請駕  
居庸關關有禁乃還閏十二月丁亥上迎春宣府以  
大車數十使僧與女共載女執毬車驅之轂擊僧首  
相觸或墮上大樂焉大學士楊廷和服闋還朝與蔣  
冕請駕於居庸上止之

十三年正月庚子朔羣臣朝不賀賜鎮守浙江太監  
王堂生祠額并護勅京畿饑多盜命賑饑上將還京

使中官預言上意於羣臣所以迎駕禮賜羣臣衣若  
馬爲御幄迎駕所賜衣一品斗牛二品蟒三品飛魚  
四品及翰林學士至侍讀皆麒麟五品堂官六科長  
皆御翰林史官給事中郎中員外皆彪獨御史豸羣  
臣鳩私金具羊酒金綵帛綵帳數十綵聯千數帳聯  
皆縷金文文稱威武大將軍百官列次不稱臣乙巳  
駕次懷來丙午大雨雪夜良久天子擁邊騎戎衣裹  
赤劍而騎炬光煜煜浴鐵閒羣臣服曳撒大帽衣所  
賜衣繫鸞帶叩頭迎道左旣至幄天子下騎坐羣臣  
手進紅梵夾陳羊酒白金綵帛楊廷和奉觴梁儲注

蔣冕奉果毛紀奉金花天子接飲曰朕手斬虜首一  
於榆河皆叩頭賀遂起馳入宿豹房丁未大雪戊申  
駕出齋宮庚戌祀南郊復如南海子觀獵辛亥夜二  
鼓駕還壬子御奉天殿羣臣行慶成禮夜分宴己未  
賜所獵獸如去歲庚申陳鹵獲器械諸物奉天門下  
令羣臣縱觀之賜銀牌一品白金二十兩二品三品  
白金十鏤曰慶功飾五采組貫朱四品五品及都給  
事中白金五兩左右給事中四御史三鏤曰賞功組  
貫青各被花紅布蓋賜如所進賀數翰林官不賀亦  
不賜是日申刻上單騎出德勝門復如宣府從者四

人餘以次追去楊廷和與羣臣諫不從二月己卯太  
皇太后崩壬午上至自宣府乃發喪朱彬遣百戶英  
捉人於平谷御史董相杖繫之彬以聞下錦衣獄已  
降爲州判巡按山東御史王相禁緝非例供奉鎮守  
太監黎鑑劾之逮繫詔獄降爲知縣上曰大行皇后  
山陵開隧道朕輕騎往視且徧祭于諸陵羣臣諫非  
故事陛下其將幸宣府工科都給事中石天柱刺血  
書疏以止上行皆不納三月庚子上行太皇太后  
尊諡詔天下以陽和衛都指揮僉事馬炅守備儀真  
兵科都給事中汪玄錫等言炅起納粟卽有功宜換



授總旗而已不繇兵部論薦冒越爲守備體要大不可者不納勒致仕左都御史彭澤爲民逮治甘肅巡撫都御史李昆兵備副使陳九疇尋調都給事中石天柱王壙於外任以都知監太監劉岑守備開原王秩調守備山海關御馬監太監黃王分守潼關自內旨都給事中汪玄錫等言非制不報以太監侯欽守備萬全左衛馮敬分守萬全右衛葉森分守獨石馬營王忭鎮守甘肅劉德分守涼州李斯監鎗寧夏自內旨戊辰上如昌平四月己巳朔祭六陵遂幸密雲密雲民訛言欲括女子斂財物進奉皆驚疑避匿哭

泣相聞永平知府毛思義出教今大喪未舉車駕必  
不遠遊我民其曠心奠業毋信姦徒滿調造言敢稱  
駕至擾民者太守捕治之或奏其言上怒執繫錦衣  
獄已降爲邊遠知州乙亥風霾晝翳日色白暈無光  
有仇殺人者官較獲之兵部歸功朱寧遂加寧歲俸  
官較友等十人皆陞賞有差谷大用提督居庸關獲  
孤旅三人逼掠之使自誣爲奸細以聞皆不敢辯上  
嘉大用功加歲俸乙未上幸喜峰關過灤河見溪流  
沙迴意有寶物命取之得異珠焉五月己亥朔日有  
食之上幸銀山薊遵化駐蹕大喜峰口駕出口外至

于溜津獵於古北漁於灤澈庚戌打魚于偏涼汀乘  
舟至北釋院口手打捕辛亥觀海于泊河觀魚于佛  
住山致朵顏三衛夷納質宴勞初上幸河西務指揮  
勳藉言供應科擾盜侵巡按御史劉士元按之至是  
勳逃行在所因嬖倖譖士元上怒命裸縛于行在軍  
門訊之駕方蹕於野束楊鞭之檻車入京并執知縣  
曹俊等十餘人竝下錦衣獄羣臣諫不聽戊申上還  
京賜羣小賜姓者朱山等十人俱爲錦衣衛小旗賜  
西域番僧食茶八萬九千餘斤人許帶六千斤下番  
不爲例六月庚辰孝貞太皇太后梓宮發引結平臺

馬上晨出北安門迎皇太后御平臺候殯復入宮率  
番僧梵呪遂親奉梓宮以朝祖羣臣爲祖祭上戌服  
馳過領待從之馬逸超騎而乘是夜宿清河癸未梓  
宮至山陵奉安于獻殿遣駙馬都尉元等分告于六  
陵上忽馳至陪祭官皆驚散遂飲獻殿宿焉甲辰梓  
宮葬茂陵乙酉上奉主還京壬辰陪祭執事官候于  
廟酉初刻上乃至降輦升階及門大雷電雨如注燈  
燭滅朝臣衛士奔避班行亂禮廢奉饗臧賢請疾上  
眷留之調陞綏德衛副千戶欽爲錦衣正千戶更姓  
朱舍人鑑等十三人俱授錦衣衛小旗革守山海關

主事卽太監王秩掌之賜秩勅得與鎮巡官議事自  
蘆溝橋至涿多盜以太監張忠都督朱泰充總兵官  
侍郎王憲兼左僉都御史提督軍務以捕盜調鎮守  
密雲太監于信薊州以太監邢安代之以參將李青  
充副總兵自內旨七月遣清平伯傑等封瀋世子詮  
爲瀋王使十三出庚子哺告廟傳制駕陞殿忽大  
雨朝臣趑趄東角門衛士督促就班雨傾盆朝臣立  
水中拜興無序未及宣制衛卒舁寶輿出夜深黑喧  
闐如沸羣臣靴注水朝大喧上自名壽曰近歲虜屢  
犯順承平日久朕慮廢兵特命總督軍務威武大將

軍總兵官朱壽統率六軍至于遼東宣府大同延綏陝西寧夏甘肅隨布人馬或守或攻內地河南山東西南北直隸僅有小寇亦便往翦削期于殄殺腥膻靖安民物其卽書勅付之遂召諭內閣及大臣科道官於左順門皆伏門下泣諫不納時大學士楊廷和稱疾不出上促梁儲毛紀勅儲奏不敢者再上怒詰責儲曰何逆命儲對臣草勅乃名君因伏地泣上大怒手劒良久罷上使御史差次應州功凡五萬六千四百四十九人下兵部尚書王瓊議當陞賞者九千五百五十五人上曰朕親臨戰率少擊多振威全捷

非若承命專閫者其如御史所差次六科十三道言  
是役也斬虜首十六級我軍死者十二人重傷五百  
十二人其閒未出國門冒者不可濫與上不納於  
是加大監張永魏彬張忠歲祿二十四石廕弟姪一  
人錦衣正千戶陞右都督朱彬三級廕一子如之給  
太監佛保等八人各歲祿十二石廕弟姪一人錦衣  
百戶陞參將神周一級廕一子如之其餘總兵副總  
兵參將督餉侍郎巡撫都御史巡按御史管糧郎中  
主事及官旗軍各陞賞有差上曰總督軍務威武大  
將軍朱壽親統六師勦除虜寇保衆安民邊境肅清

聖武神功宜隆報之其特加公爵上曰從征臣士旣  
論功矣尚念太監谷大用掌守關城勤勞夙夜蕭敬  
溫祥賴義秦文張欽蔣貴韋霁張淮李英典司機務  
慎重安詳張銳并都督朱寧提督官較防察周密兵  
部尚書王瓊并侍郎陳玉王憲勤於籌議太監于經  
周昂奉命往來不懈都督朱寧朱洪宋贊練士馬大  
用銳并敬等各歲加祿米二十石廕弟姪一人寧瓊  
各賞銀五十兩紵絲四表裏廕子一人俱錦衣衛世  
襲正千戶經昂各加祿米十二石廕弟姪一人王憲  
各廕子一人俱錦衣衛世襲百戶泰洪贊各陞一級



錦衣衛官舍朱政朱勛朱舍利朱得那左右效勞各  
廕爲本衛百戶世襲指揮使上曰內閣楊廷和梁儲  
蔣冕毛紀運籌定議協力成功各賞銀五十兩紵絲  
四表裏廕子姪 人錦衣衛世襲正千戶文武各衙  
門皆供事勤勞五府六部掌印官都察院左右都御  
史等官各賞銀五十兩紵絲四表裏五府堂上見任  
并侍郎副僉都御史通政使大理寺卿錦衣衛堂上  
官各賞銀三十兩紵絲二表裏左右通政參議大理  
少卿寺丞并科道掌印官各賞銀二十兩紵絲一表  
裏兵部該司官郎中銀十兩員外主事各八兩羣臣

諫不聽江西清軍御史范輅與鎮守太監畢真計奏  
輅輅京師既至謫之遣番僧覺義領占剌巴等封烏  
思藏國僧爲闡教王剌巴等乞給馬快船三十載食  
鹽爲入番買路資部科執奏詔特許之命都指揮僉  
事佐管事南鎮撫司以錦衣衛指揮同知暹管事象  
房自內旨上曰朕念虜警特行邊其令兵部治兵馬  
戶部治器械各遣侍郎一人率司屬二人從朕丙午  
侵晨發羣臣知而送者五十餘人乃使楊廷和居守  
丁未上度居庸復禁闢遂歷懷來保安諸城堡復駐  
蹕宣府巡撫都御史王守仁討岑濶二賊悉平之八

月太監張忠管皇莊於武清羣小肆天津兵備副使胡文壁執治之逮繫詔獄降爲雜職乙酉上自萬全右衛懷安天城陽和至大同駐蹕焉九月大同鎮守太監馬錫以總兵葉椿第爲獻遂改爲總兵府又改都指揮俊所置二店爲酒肆榜曰官食皆使券而不價庚子至上至偏頭關索女樂於晉府樂人騰妻劉良女善謳上悅而嬖之左右觸上怒者陰求良女輒一笑罷於是近貴多掠良家子女冀上悅後車數十日有死者上曰總督軍務威武大將軍總兵官朱壽統領六師掃除邊患累建奇功特加封鎮國公支祿米

五千石吏部其如勅因封右都督朱彬爲平虜伯左都督朱泰爲安邊伯各食祿米千石予世復陞廕太監魏彬等弟姪一十五人朱寧六歲子永安爲都督錫蟒衣玉帶皆以應州功十月戊辰上渡黃河己卯駐蹕榆林月食十一月上下倣邊帥體遣夜不收持火牌調西官廳勇士四衛二營馬隊官軍勇士六千二百六十八人馬六千五百七十二匹赴宣大按伏徵太監清少監漢等九十一人赴延綏家人匠役皆給傳壬子上至綏德州幸總兵戴欽第納欽女上將幸陝焉御史張文明諫文明外裁抑諸權倖而綏德

知州棟復誤上供太監張忠言上上怒命執械文明  
棟於京師十二月南京尚膳監奉御王敬進鮮過徐  
例外索折乾錢不得與知州樊淮詎淮發其舟中夾  
帶違禁諸物敬詣兵備余祐爲解祐不應敬還奏淮  
祐毆辱之逮繫鎮撫司鞠治各降二級於邊方戊寅  
上自榆林歷米脂綏德渡河幸石州文水諸州縣戊  
子駐蹕太原熨蠻攻破高慶符二縣

十四年正月戊戌上發太原壬子至宣府皆腰弓劍  
乘馬風雪中三改郊二月壬申還京師羣臣迎駕如  
前歲禮上閱首虜器仗於外教場暮乃入賜羣臣銀

牌花紅有差皆辭不允造鎮國公牙牌誥券羣臣諫  
甲戌將郊誓戒羣臣以夜不能待傳制而退乙亥夕  
乃使羣臣齋丙子上從騎百餘人乘馬入郊壇丁丑  
郊遂獵南海子是日地震風霾戊寅上夜還風霾止  
大學士楊廷和繳還居守勅上曰其畱朕尚不時巡  
狩焉羣臣皆諫悉畱中刑部主事汪金疏言上不可  
時巡者九宜戒者一其一謂九者不可利害較然獨  
竊聞乘輿居起杯酌常隨清晝已醺而左右復預旣  
醉乍醒罌甌續進時輒冷飲夫酒能令人亂性善忘  
致病伐生者也好惡愆違可否貿亂莫不繇此羣小

竊權之心惟恐陛下一刻清明不克遂奸寧計玉體有所傷憊乞省臣言少垂睿戒不報調鎮守浙江太監鏜於兩廣鎮守江西太監貞於浙江以南京守備太監璟守備河南自內旨令左都督暉同安邊伯寧監督團營西官廳管操御馬太監欽祿保同太監增等監督勇士四衛提督團營御馬監太監和同太監永把總神機營御馬監太監永玉同太監大用提督勇士四衛營自內旨張忠朱泰王憲獲涿蘆溝之盜各廕子姪一人錦衣百戶世襲其餘參將而下三百八十二人陞賞有差已盜首六人逸獄久乃得之兵

部尚書王瓊又曰朱寧功賜寧獎勅增歲俸五十石  
加廕子一級賜左都督劉暉神周都督僉事李琮國  
姓上將南巡焉曰總督軍務威武大將軍總兵官鎮  
國公朱壽其加太師令往南北兩直隸山東泰安州  
等處尊奉聖像供獻香帛以爲民祈福工部急修黃  
船馬快待羣臣皆諫調鎮守湖廣太監甫于福建鎮  
守貴州太監鎮于湖廣分守四川建昌太監輔于貴  
州自內旨三月以管家將千把總朱勇等四十七人  
俱填註錦衣衛帶俸舍餘朱郭綱等千一百人各充  
御馬監家將勇士食糧領馬騎操家將之名自此始



太監馬永成死賜祭葬建享堂碑亭若齋糧麻布太監亨爲其門下乞陞授皆許之凡九十餘人令太監彬管神機營中軍二司并練武營自內旨調分守懷來太監寶鎮守陝西以守備萬全右衛太監欽代之以倒馬關太監昇代欽自內旨丙午六科給事中十三道御史諫南巡不報皆伏闕俟命辰至申上恚甚使宣諭乃退丁未月望鴻臚寺請陞殿視朝上曰朕病氣不能朝矣己酉羣臣詣左順門問安以御馬監太監忠守備紫荆關金守備倒馬關左監丞厚守備劉家口御馬監太監春監督勇士營自內旨是時寧

王宸濠久蓄異謀有言伺上南幸以輕舟伏甲迎駕將爲亂而上行意決羣臣憂懼不知所出癸丑武選郎申黃輦具諫疏車駕員外郎陸震附名同上既入不報於是吏部員外郎中夏良勝禮部主事萬潮太常博士陳九川三人爲一疏翰林院修撰舒芬編修崔桐庶吉士江暉王廷陳汪應軫馬汝驥曹嘉七人

爲一疏

陳九川字惟濟臨川人正德中聯舉進士凡

舉進士安同舍生共驢出入之忽覺入仕之難三疏

請告歸師王守仁於虔臺出授太常博士獨與諸公

諫南巡被杖嘉靖初元授正德諸諫臣仍補太常己

爲禮部主客司郎中被趙事陳紳誣告下詔獄謫戍

鎮海後解還求友四方講學明道常曰人生明日兵

無地非學無地非友即無地非講習之處

部郎中孫鳳等十六人爲一疏刑部郎中陸偉等五  
十五人爲一疏又明日吏部郎中張衍瑞等十四人  
爲一疏禮部郎中姜龍等十六人爲一疏醫士徐鏊  
自爲一疏以醫諫上大怒曰朕病未寧不問視乃出  
位妄言多詘謗輩震良勝潮九川鏊其執送鎮撫司  
嚴治之鳳行龍偉芬等一百八人俱罰跪闕五日卯  
至百官較時視之待日足聞丙辰行人司司副余廷  
瓚等二十八人復爲一疏諫上愈怒令繫鎮撫司嚴  
加掠治明日大理寺寺正周叙等十人爲一疏又明  
日工部主事林大輅等三人爲一疏皆極諫上怒益

甚命廷瓚等并輦震良勝潮九川鑿俱更拮拏號五日廷暴之日足復繫詔獄胥後命時京師人情震駭公卿大臣被唾罵投擲晨夕出入不敢待辯色數日陰霍晝晦水溢南海子不了橋高四尺鐵柱七根齊折如斬金吾衛都指揮僉事張英曰是大變故明驗駕出必不利肉袒挾兩囊上跪端門外衛士詰之曰至尊若出生靈無依英當隨駕若遇變寧死此卽自刎其胃衛士奪英刃不死亦下獄鞫治問英何囊土爲恐灑血汚帝廷土掩之耳法司坐英妄言擬斬詔杖之八十遂死戶部尚書石玠請寬諸臣罪上怒詰

責玠自服乃罷戊午杖孫鳳等百七十人于午門各三十并陸倕張衍瑞姜龍舒芬皆調之外任諸臣言者皆及江彬彬陰助上怒杖甚楚刑部主事劉按照磨劉珏死焉四月壬申杖鞏震良勝潮九川叙大輅廷瓚鑒於獄中丁丑杖之闕下各五十鞏震良勝潮九川黜爲民叙大輅廷瓚降三級外補鑒成瘡方其餘部寺官繼上疏者各杖四十降二級旬日開震廷瓚及工部主事何遵刑部主事劉較評事林公黼刑部照磨劉珏行人詹軾孟陽劉槩李紹賢李惠王翰等相繼死蓋十餘人上亦竟不言南巡事

何遵江寧人恂恂

不能言正德甲戌歲士則南事竣行李蕭然登  
舟波浪大起投詩江神江浪頓靜其卒也父聞上郎  
有三人諫至于缺附腐慟曰吾兒其一矣計至果然  
當過以候時人語遵法者得賂則輕公亦自周旋所  
自榮既無錢法不可行李紹賢肝貽人以進士劉  
吳戶部齋部銀銷邊火耗羨餘悉贍付官為行人齋  
孝貞皇后還部往江北至徐州開請時羣閹勢焰幸  
之見州衙職官假然席班首結賢從客去開帝不得  
與職官同禮時經紳得買多絳連已卯月食戶部尚  
書石玠乞休許之以太監俊坐神機營左掖三司管

操太監祿分守建昌行都司并川南道等處五月復  
代祿以太監欽以太監滿司香太和山兼分守湖廣  
行都司等處自內旨詔自今大漢將軍試百戶五年  
實授著為令試御史蕭淮奏寧王宸濠諸圖不軌狀

遣太監賴義駙馬都尉崔元帥御史顏頤壽往諭之  
六月義等行未至宸濠殺巡撫都御史孫燧按察副  
使許達以反收總督兩廣軍務都御史爲提督軍務  
避上號也太監得玉爲故太監敏乞恩廕授錦衣衛  
指揮及僧道醫官凡八十人張忠復言御史張文明  
於上上親鞫文明豹房文明自分死上忽悟釋而謫  
之瘴邊兵部集議請命將討宸濠上曰朕親征焉其  
遣安邊伯泰掛威武副將軍印充總兵官趙南京太  
監忠提督軍務左都督輝掛平賊將軍印充總兵官  
趙江西令總督軍務威武大將軍總兵官後軍都督

府太師鎮國公朱壽統各鎮邊兵親勦之羣臣諫不  
聽監察御史陳察上疏上怒奪其俸曰再言者極刑  
之削宸濠封爵屬籍告天下提督南贛都御史王守  
仁與吉安知府伍文定等討宸濠平之廠衛旗較妄  
言賊人劉學孟貴等爲妖言聚衆河南將爲亂尋獲  
之命三法司會鞫擬凌遲處死遂論太監張銳朱寧  
功加祿米歲百二十石廕陞其弟姪一人三級八月  
命平虜伯朱彬提督東廠錦衣衛官較行事上故寵  
銳寧使銳居東廠寧居錦衣也至是命彬兼之定乾  
清坤寧二宮礫勅廕與勞者太監張永而下二十七



人有差雖其甥表亦與武臣則新寧伯祐平虜伯彬左都督寧文臣則大學士廷和冕儲紀兵部尚書瓊工部尚書燧皆得廢上曰朕統六師親征反者仍託總督軍務威武大將軍總兵官鎮國公名號其寫勅與之楊廷和爭不可上槌他事譴廷和亦及梁儲起用忤宸濠者前江西布政使鄭岳副使胡世寧癸未上發京師使梁儲蔣冕扈從命太監張永率團營邊鎮兵五百人提督贊畫機密重務兼覈按宸濠反事平虜伯朱彬與左都督朱周提督贊畫機密軍務仍軍門提督官較辦事掌錦衣衛事左軍都督朱寧量

帶官較隨駕都督僉事朱宗同太監劉祥佛保統捕盜硬兵官兵五百人押船防運神器以錦衣衛帶俸都指揮僉事朱政南鎮撫司管事賜宣府右衛中所百戶劉昱等四人國姓皆填註錦衣衛帶俸臧賢坐爲宸濠通賄於太監蕭敬吏部尚書陸完都督朱寧三人者杖戍邊旣遣寧使盜殺賢於途以滅口丁亥上至涿畱太監張忠私第王守仁捷至上不發而決南幸戊子至保定九月壬辰朔上宴保定府堂與都御史伍符爲藏闔之戲再不中投闔於地使拾之罰符數瓢酒符醉上乃喜戊戌至臨清山東諸鎮巡官

皆從越三日令進宴宴具草上視笑曰慢我太甚及宴都御史王珣獻觴步緩上目之神周恠珣曰且不測明日又宴都御史龔弘趨而進言姓名江彬叱之上亦自如太監黎鑑有所索於有司珣不可鑑頭觸珣遂鬪入泣上前上曰都御史何敢輒辱爾爾必有求王守仁將以宸濠之俘獻自江西至杭上使張永止之上南征劉良女獻簪上納焉且以爲召信上馳而失之至臨清使召不至上夜乘輕舸疾歸與良女俱載而南乙卯萬壽節至德州不泊從官望拜於河渚十月己亥月食羣臣以宸濠就擒請上旋師不報

壬午發臨清十一月辛卯朔過濟寧丙申至徐辛丑  
御龍舟自徐順流下乙巳至淮安幸監鎗太監張陽  
第漁清江浦累日賜所捕魚於左右左右獻金帛謝  
是時南京河南山東淮揚等處文武官皆來集或送  
或迎無貴賤戎裝徒行道路閒江彬不時傳旨有所  
徵索拷縛郡縣長吏如奴隸又矯旨大索鷹犬珍玩  
於民間壬子冬至節羣臣稱賀張陽第甲寅上屏侍  
衛徒步入淮安城幸總兵官顧仕隆第己未上漁范  
光湖十二月辛酉朔上至揚州太監吳經預奪民居  
改爲提督府矯旨言上將刷處女寡婦焉知府蔣瑤

爲民請命經大怒夜半遣騎卒開城門呼駕至堽巷  
列炬大拷婦女破屋壞垣必碎之尋分送之尼寺贖  
乃免壬戌上數騎獵城西遂幸上方寺自是數獵劉  
良女諫乃止令神周取鷹犬泰州括民百餘爲獵手  
大獵三日辛未命明年正月郊祀於南京梁儲蔣冕  
再四諫乃寢戊寅上閱妓揚州撫按官進宴却之取  
燕直乙卯至儀真禁民畜豬曰近國姓犯者戍極邊  
癸未漁儀真之新開視大江命江彬攝祭大江神明  
口幸民呂本家復閱妓半送之舟中乙酉渡江丙戌  
至南京丁亥祭南京太廟戊子祭奉先殿旣下拜不

能興者良久

十五年正月庚寅朔謁孝陵丁酉迎春於南京備諸  
戲劇如宣府司禮監官秀過臨淮知縣吳鼎待之慢  
入言上逮訊之京師命改郊先師社稷之祭亦俟後  
丁戌三月太常寺以方禁豬請所以供犧牲上曰陵  
寢祭祀所從來也仍用豬以太監蘭鎮守山東兼管  
臨清地方自內旨四月淮揚大饑人相食圖月食  
梁儲蔣冕以聖駕久外乞罷免不報江西諸郡大水  
六月上微行至牛首山宿衛諸軍夜驚失上所在七  
月熨蠻平夜有物墮上前如豕首其色綠閏八月上

有游蘇杭泛江浙泝湖湘登武當之意梁儲蔣冕手  
奏乞迎鑾跪泣行宮門外未至酉上遣中官內其奏  
命之起對曰未得乞中官傳旨曰已知卽回鑾乃起  
羣黨尚欲還縱宸濠於江天子與之遇而復擒之張  
永不可乃以大將軍鈞帖令王守仁重上捷音守仁  
約前疏再叙羣黨功始議北旋壬辰上詣孝陵辭癸  
巳受江西俘丁酉旋蹕發龍江使宸濠舟尾御舟辛  
丑至儀真壬寅漁于江口次日如瓜州避雨民家夕  
宿望江樓癸卯自瓜州濟江登金山遂如鎮江幸致  
仕大學士楊一清第明日復幸取其冊府元龜文獻

通考以去又明日又幸焉樂作分題賜一清製詩十

章命更定屬和一清進杯爲蘭門之歌上大悅及駕

還凡五幸故大學士靳貴方卒上入其家使番僧繞

匱誦經三匝靳貴丹徒人學於丁璣弘治己酉鄉舉

侍武宗東宮在講筵儀制修偉音吐洪暢援據開發

義歸於正正德中爲禮部侍郎劉瑾諷令密書翰林

官殿最將有所升落貴不應銜之左遷光祿卿供復

舊久之以禮部尚書入問貴靜重簡默對客論事恒

不盡其辭至遇當言侃侃靡顧忌武宗嘗遣近臣詰

問開陳利害不少回互出未嘗泄家居簡儉作師儉

堂以示

庚子發鎮江壬子復宿望江樓癸丑上至揚

州九月丁巳撫按等官進金銀牌各二軸一旗帳一

綵帛若干匹設慶功之宴戊午發揚州庚申復漁范



光湖太監丘得索知府蔣瑤貢物加糾纏焉辛卯上  
駐蹕淮安都御史蕭蘭總兵官顧仕隆進賀功金牌  
花紅綵帳上戎服簪花鼓吹騎入城過山陽縣學入  
之視廊廡肖像移時復入教官舍取通鑑諸書出止  
故尚書金濂第癸亥重陽左右競進菊丙寅至清江  
浦復幸張陽第三日漁積水溺馬出左右呼萬歲曰  
龍也丙子至東昌戊寅萬壽節至臨清羣臣稱賀鎮  
守太監  
第十月庚寅至天津庚戌至通州十一  
月捕交通宸濠者吏部尚書陸完太監商忠等十二  
月平虜伯朱彬奏臣隨駕南征奉總督軍務威武大

將軍總兵官後軍都督府太師鎮國公朱壽指示方略擒捕宸濠及其逆黨十五人乞典刑殛之上曰卿承受方略捕賊無遺地方安謐朕甚嘉焉其先加祿米歲百石廕一子錦衣世襲正千戶功賞行別論召皇親公侯駙馬伯內閣府部大臣科道官於通議宸濠獄賜宸濠死燔之甲午上還宮大耀軍俘數千人陳東西輦道陸完錢寧裸反接死者竿其首皆標白幟書姓名彌望數里上戎衣騎而閱正陽門下良久入諸俘自東安門經大內出丁巳乃補郊初獻上拜伏嘔血扶歸於齋宮踰宿駕乃入羣臣問安左順門

女直都指揮僉事速黑忒進小熊一特納之太監于經侍疾頑慢上斥之使就學內書堂壬子力疾親朝降手勅改王瓊爲吏部尚書

十六年正月上力疾詣奉先奉慈二殿及皇太后宮行禮出祝朝己未耐孝貞純皇后神主太廟辛丑乃補禪以不豫復改郊二月又改郊古田蠻賊平虜大入威遠松山等堡三月癸丑朔日食清遠四會二縣遣賊復起回賊流劫山陝界中改團營西官廳爲威武團練營以西官廳監督太監張忠安邊伯朱泰平虜伯朱彬都督朱洪朱暉朱周朱琮提督之別闢練

團營教場於他處兵部執奏不許乙丑上大漸于豹  
房召司禮監使達意皇太后曰前多誤天下事重其  
與輔臣議處丙寅上崩殯大內慈壽皇太后命迎取  
興獻王長子於興入嗣皇帝位四月入爲世宗皇帝  
上尊諡曰承天達道英肅睿哲昭德顯功宏文思孝  
毅皇帝廟號武宗九月葬康陵壽三十有一

臣喬遠曰帝在東宮勤於學問踐祚之後猶未嘗輟  
一時近倖蠱上冲年冀幸竊政然覺敗之後卽裁繩  
之可謂天德之剛矣我明傳序於帝九世英宗而上  
皆嘗經武遏亂至于憲祖孝考文教熙治息馬投戈

惟帝留意戎事慨然有肅清海宇鞭笞夷虜之志郊  
畿之外復見旄頭虎豹之清塵焉跡夫七萃之士頻  
從三洲之詩已奏而輔導謀議之臣不懈於內奔走  
禦侮之良戮力於外良民則俛首供饗餉無所怨咨  
節士則捐軀赴難無顧悔雖列聖功德之在天下亦  
絲委託得人紀綱不紊無急酷之政以傷民心者矣  
是以能保祖宗基業以遺之後皇者歟